

Aen Goj Daxmeh Caeuq Daeglwg

□ Cwz Fanghdingz soucomz cingjleix

Doenghbaez giz meh caeuq daeglwg youq nit raixcaix, mbouj miz raemx, mbouj miz feiz. Meh naemj daiq daeglwg byaij ok giz nitgyaengi neix.

Gyoengqde hwnjroen lo, gyauej daenj gyaep, re fwn rwed, re roegga yiuhyak caegguk hoenx; ga daenj haiznyangj, re nam coeg meng camx; fwngez gaem diuz faex damq roen, youq gwnz roen raen ngwzdoeg laengz roen couh moeb, raen nywj, gaeu lanz couh deuq bae; ndaw baufug dwg gij mak yw iek.

Gyoengqde byaij ndaej sam cien sam bak samcib sam ngoenz, daeuj daengz giz miz sam cien sam bak samcib sam diuz dah ndeu. Daeglwg angqfwng naeuz daxmeh: “Meh ha, gij raemx raeuz yaek ra haenx ra raen lo, raeuz couh youq gizneix youq ndaej lwi?” Daxmeh daengx roengzdaej sijsaeq baez yawj, cijraen raemxhung goenjhuu, dumh doengh dumh bya, rumz bongj raemx goenj lumj duz iugvaiq heuh, raemx yaep ndeu hwnj yaep ndeu roengz, mbouj miz saek seiz bingzdingh, youh nding youh henj. De bibi gyauej, doiq daeglwg naeuz: “Gizneix dan miz raemx, mbouj miz feiz, mbouj miz daengngoenz, youq mbouj ndaej.” Gangj liux youh daiq daeglwg hwnjroen lo.

Gyoengqde youh byaij ndaej sam cien sam bak samcib sam ngoenz,

byaij gvaq fouzsoq byasang caeuq dingh, mbouj geijlai nanz couh daeuj daengz giz bya remj dat daengj, rin remj doem remj, mbouj miz doenghgo maj ndaej ndeu. Laj namh nanz mbouj nanz miz baenz raq baenz raq hoenz-ndaem feizhaenq bongj hwnjdaej, feiz bonghhuhu, daj gizneix coemh gvaqdaej, youh riengz rumz daj gizneix coemh gvaqbae, rin hix deng coemh baenz daeuh. Daeglwg yawj-raen feiz, faengzftw naeuz daxmeh: “Meh ha meh, neix mbouj dwg gij feiz raeuz yaek ra ha? Raeuz ra raen lo, raeuz couh youq gizneix youq ndaej lo!” De ngamq gangj sat, raq feizhaenq ndeu daj ndaw congh laepngau laj namh bongj hwnjdaej, coemh coh de, danghnaeuz mbouj dwg meh gibseiz rag de doenq laeng, bwnda de couh deng coemh bae liux lo. “Neix mbouj dwg giz raeuz ra, raeuz laebdaeb byaij roengzbae!” Daxmeh gangj sat youh daiq daeglwg hwnjroen lo.

Gyoengqde daeuj daengz ndoeng faex ndaetndwtndwt ndeu, ndoeng faex neix mbaw loenq na baenz sam cik, nyefaex dingj mbwn, rag faex goemq deih, daxmeh caeuq daeglwg byaij ndaej sam cien sam bak samcib sam ngoenz, cij byaij ok ndoeng faex neix. Baihrog miz nditndat raeujrub, raemxrij laecece, rumz unqswnh, gwnz bya miz faexheuh, lienzdaemh

mbouj duenh. Daxmeh ok rengz dem gaemz heiq ndeu, angqfwng naeuz daeglwg: “Lwg ha lwg, giz raeuz yaek ra ra raen lo, raeuz couh youq gizneix youq lo!” Yienghneix song mehlwg couh doengh fwngez daeb ranz caux rug, haifwz caux reih. Hoeng gyoengqde baenzneix guh, cauz daengz gij doenghduz hunghung iqiq gwnz bya lo, gyoengq doenghduz haenx comz youq giz ndeu, naeuz vnz ciemqfamh giz gyoengqde lo, yaek gunghoenx vnz. Daeglwg rox le, daeuj cam daxmeh naeuz: “Raeuz wnggai baenzlawz

guh?” Meh hawj de bae ra di nywjroz ndeu daeuj, yungh rin gaek ok feiz, diemj dawz nywjroz, coemh hwnj dong feizhung ndeu. Liuxle daxmeh youh gaem hwnj bog feiz ndeu, bae diemj dawz mbiengj bya gyoengq doenghduz comzyouq haenx. Feiz yied coemh yied haenq, gyoengq doenghduz raen le, lau dwk ndonj bae bongh dauq. Daj neix hwnj, doenghduz baez raen vnz couh deuz bae vaiqviet, daxmeh caeuq daeglwg couh youq gwnz bya coemh gvaq haenx haifwz dajndaem.

(1)



Aen dungceh hai gvaq gwnz naz henjrubrub gyaundeide dangqmaz.
Liz Gezyenz ingj

Vangz Gencingh caeuq Lij Danenz youq “ndeij lajmbwn” gvet hoi haj bi lai lo, Cinz Giveih gig saenq songde, bi 2020 hongsaeh lai le, Cinz Giveih siengj bau gij hong gvet hoi okbae.

Lij Danenz ciengzseiz dwk denva hawj Cinz lauxbanj, bau hong dajcang guh daengz lawz. Ngamjhab, Cinz lauxbanj heuh de bae yawj dieghong moq.

Naengh youq gwnz ci lauxbanj, Lij Danenz bak lumj daz caengz youz ndeu, gangjvah lauzladlad, Cinz lauxbanj roxnyinh lajfwngz miz vnzcaiz yienghneix, guh noix ndaej lai, lumj hoenxciengq hoenx bak baez hingz bak baez.

Lauxdoengz

□ Moz Lijginz / 磨礼勤

“Lij saefouh, gou siengj bau doengh laeuz neix hawj mwngz caeuq Vangz saefouh guh.” Cinz lauxbanj naeuz.

“Ndeij ha, dou itdingh guh hawj mwngz rimhoz!” Lij Danenz ndaw sim miz daej, yungzsim gig hung.

Cinz lauxbanj: “Bau hong mbouj bau liuh, moix bingzfueng cibcaet maenz, mwngz baema caeuq Vangz saefouh gangj, habguh couh guh, gaej auqmanz.”

Seiq

Sam doengh daihlaeuz hong gvet

hoi sat, Cinz lauxbanj doenggvaq soujgih veihsin daj cienzoeng hawj Lij Danenz, Vangz Gencingh, youz songde fat cienzoeng hawj gak boux gunghyinz.

Lij Danenz song gvanbaz daiq song lwgnyez bae laeng Vangz Gencingh guhcaemz, gyoengqde song ranz daj gap lauxdoengz doxdaeuj, ndaej hoengq couh bae cunz ranz doiq-fueng, gij gwn mbouj gangj, cujyau dwg gangigoj. Vnz couh dwg yienghneix, ciengzseiz youq ndaw mbanj ndaw ranz at nanz le, baez byaij okbae, simcingz couh mbouj doengz, vahnug naeuz: “Baihrog gwnzbiengz gig ndei”, caen dahraix,

dieg moq ronghda moq hoengheiq moq, gangjvah coenzcoenz moq. Yienznaeuz gapdoengz seiq bi le, song ranz baedauq lai baez, song fueng baezbaez raennaj baezbaez moq, daegbied dwg song boux vnz-mbwk, gijvah gyoengqde lumj raemxrij lae mbouj dingz mbouj duenh.

Haj boux lwgnyez, Lij Danenz song dah, Vangz Gencingh song daeg dah ndeu, gyoengqde youq laj gofaex guh yahndoj, hemqhemq riuriu, roegbang gwnz faex hix gaendwk hemqcaca, youq gwnz nyefaex saet bae saet dauq. Vangz Gencingh caeuq Lij Danenz youq ndaw ranzdajcawj ciencien caujcauj, noh hom byaek rang, gij heiq hom yawj mbouj raen haenx daj bakdou mauh okdaej, roeg gwnz faex mup dawz le caemh roengzdaej, duzdug cungj ndwnj myaiz.

(3)

